

深圳市河山科技开发有限公司

整理制作



中华兵法大典



军政、军志辑佚

《孙子·军争》：

（孙子引）是故，《军政》曰：“言不相闻，故为鼓金；视不相见，故为旌旗。”是故，昼战多旌旗，夜战多鼓金。鼓金旌旗者，所以一民之耳目也。民既已专，则勇者不得独进，怯者不得独退：此用众之法也。

《左传·宣公十二年》：

（楚·孙叔引）《诗》云：“元戎十乘，以先启行，先人也。”《军志》曰：“先人有夺人之心。”薄之也。遂疾进师，车驰卒奔，乘晋军；桓子不知所为，鼓于军中，曰：先济者有赏。中军下军争舟，舟中之指可掬也。

《左传·文公七年》：

（晋·赵盾引）先人有夺人之心，军之善谋也；逐寇如追逃，军之善政也。训卒利兵，秣马蓐食，潜师夜起。戊子，败秦师于令狐，至于刳首。

《左传·昭公二十一年》：

（宋·厨人濮引）冬，十月。华登以吴师救华氏，齐乌枝鸣戍宋，厨人濮曰：“《军志》有之：‘先人有夺人之心，后人有待其衰。’盍及其劳，且未定也，伐诸，若入而固，则华氏众矣，悔无及也，从之。”

《左传·僖公二十八年》：

（楚王引）《军志》曰：“允当则归。”又曰：“知难而退。”又曰：“有德

不可敌。”

《左传·宣公十二年》：

（晋·士会引）见可而进，知难而退，军之善政也；兼弱攻昧，武之善经也。子姑整军而经武乎。

《吴子·料敌》：

（吴起引）有不占而避之者六；一曰：土地广大，人民富众。二曰：上爱其下，惠施流布。三曰：赏信刑察，发必得时。四曰：陈功居列，任贤使能。五曰：师徒之众，兵甲之精。六曰：四邻之助，大国之援。凡此不如敌人，避之勿疑。所谓“见可而进，知难而退也。”